



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONI RREGULLATOR

Data: 3.3.2025

Nr: 15

Ora: 13:30

V E N D I M
P E R

MIRATIMIN E RREGULLAVE PËR KRIJIMIN E QENDRAVE TË POSAÇME TË VOTIMIT, HARTIMIN E LISTËS SË ZGJEDHËSVE DHE KRIJIMIN E KOMISIONIT TË QENDRËS SË VOTIMIT NË INSTITUCIONET E EKZEKUTIMIT TË VENDIMEVE PENALE PËR ZGJEDHJET PËR KUVEND TË DATËS 11 MAJ 2025

Në mbështetje të nenit 20, pika 1, shkronja "a" e pika 3, dhe të nenit 43, të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar, me propozimin e Komisionerit Shtetëror të Zgjedhjeve, Komisioni Rregullator

V E N D O S I:

**Neni 1
Qëllimi**

Ky vendim përcakton rregullat dhe procedurat për krijimin e qendrave të posaçme të votimit, hartimin dhe administrimin e listës së zgjedhësve në Institucionet e Ekzekutimit të Vendimeve Penale (IEV), si dhe krijimin e komisioneve të qendrës së votimit (KQV) për zgjedhjet për Kuvend të datës 11 maj 2025.

**Neni 2
Rregulla të përgjithshme**

1. Qendrat e posaçme të votimit sigurojnë ushtrimin e të drejtës për të votuar të zgjedhësve me kushte të veçanta, duke garantuar transparencë, integritet dhe akses të barabartë.
2. Çdo qendër votimi duhet të përmbushë standardet për organizim, siguri dhe aksesueshmeri dhe të garantojë të drejtën e votimit në fshehtësi në përputhje me aktet nënligjore të KQZ-së.
3. Zyra e gjendjes civile pranë njësive të vetëqeverisjes vendore është organi përgjegjës për hartimin e listës së zgjedhësve edhe për institucionet e posaçme në përputhje me legjislacionin në fuqi.
4. DPGJC siguron që personave të cilëve ju është kufizuar/ hequr e drejta për të zgjedhur të mos përfshihen në listat e zgjedhësve.



Neni 3

Hartimi i listës së zgjedhësve

1. Kryetari i bashkisë, gjatë procesit të hartimit të listës së zgjedhësve për çdo zonë qendre votimi, identifikon si zonë qendre votimi edhe Institucionet e Ekzekutimit të Vendimeve Penale (IEVP).
2. Kryetari i bashkisë njofton drejtuesit e IEVP-ve që të identifikojnë dhe të dorëzojnë dokumentacionin e nevojshëm për zgjedhësit me të drejtë vote që janë me vendqëndrim në këto institucione të posaçme nën juridiksionin e të cilës ndodhet IEVP.
3. Drejtuesi i IEVP identifikon të gjithë të burgosurit me të drejtë vote në institucionin e posaçëm dhe përjashton nga lista personat që kanë humbur këtë të drejtë.
4. Drejtuesi i Institucionit të Posaçëm (IEVP) përgatit listën e të burgosurve që ndodhen në IEVP deri ditën e zgjedhjeve dhe dërgon këtë listë Kryetarit të Bashkisë nën juridiksionin territorial të së cilës ndodhet IEVP dhe Drejtorisë së Përgjithshme të Gjendjes Civile (DPGJC) jo më vonë se 60 ditë para ditës së zgjedhjeve.
5. Kryetari i bashkisë nëpërmjet zyrës së Gjendjes Civile të Bashkisë në bashkërendim me Drejtorinë e Përgjithshme të Gjendjes Civile verifikon listën e zgjedhësve, konfirmon listën e zgjedhësve me të drejtë vote sipas rregullave të parashikuara në Kreun II, Pjesa III, të Kodit Zgjedhor dhe ja dërgon KZAZ-së dhe IEVP-së jo më vonë se 40 ditë para ditës së zgjedhjeve, për secilën zone qendre të votimit ku ndodhen institucionet e posaçme.
6. Drejtuesi i IEVP-së afishon listën e zgjedhësve në ambientet e qendrës së posaçme të votimit.

Neni 4

Krijimi i Qendrave të Posaçme të Votimit

1. KZAZ pas administrimit të listës merr vendim për ngritjen e qendrës së posaçme të votimit dhe i propozon KQZ-së krijimin e Komisionit të Qendrës së Votimit jo më vonë se 35 dite para ditës së zgjedhjeve.
2. Komisioneri emëron anëtarët e KQV-së së posaçme ose autorizon KZAZ-në të emërojë anëtarët.
3. Qendrat e votimit që krijohen brenda territorit të IEVP-së identifikohen me numërtimin unik nga kryetari i bashkisë.
4. Drejtuesit e IEVP-se marrin masa të sigurojnë që materialet zgjedhore që mbërrijnë në qendrën e posaçme të votimit të ruhen në përputhje me standardet e përcaktuara në Kodin Zgjedhor dhe aktet nënligjore në fuqi.

Neni 5

Garantimi i sigurisë dhe procesit të votimit

1. Në institucionet e ekzekutimit të vendimeve penale, votimi zhvillohet në prani të personelit të policisë së burgjeve, KQV-së dhe vëzhguesve në përputhje me Kodin zgjedhor dhe aktet nënligjore dalë në zbatim të tij.
2. IEVP-të marrin masa të sigurojnë dhe lejojnë vëzhguesit e akredituar për këtë qendër votimi si dhe anëtarët e KQV-ve, personelin teknik të KQZ-së të ndjekin procesin e zgjedhjeve në QV në përputhje me rregullat e sigurisë.
3. Drejtuesit dhe personeli i institucioneve të posaçme nuk duhet të ndikojnë apo të sugjerojnë përzgjedhjen e një kandidati apo subjekti zgjedhor nga zgjedhësit në këto qendra të posaçme.

4. Institucionet e posaçme jo më vonë se 48 orë para ditës së zgjedhjeve dërgojnë në KZAZ dhe në KQZ personelin që do të jetë i pranishëm në qendrën e posaçme të votimit, sipas pikës 1 të këtij neni.
5. IEVP-të marrin masa të sigurojnë dokument identifikimi të vlefshme për zgjedhësit e burgosur në mënyrë që ata të votojnë.
6. KZAZ i dërgon IEVP-së jo më vonë se 48 orë para ditës së zgjedhjeve listën me emra të anëtarëve të KQV-së, vëzhguesve të subjekteve politike që do të vëzhgojnë procesin.
7. Ndalohet që një punonjës i burgut të asistojë në mbushjen e fletës së votimit të një zgjedhësi në qendrat e posaçme të votimit.
8. Pajisjet e sigurisë, si kamerat e mbikëqyrjes, vendosen për të verifikuar rregullsinë e procesit dhe nuk duhet të fokusohen tek dhoma e fshehtësisë ku kryhet votimi.

Neni 6

Dispozitat Përfundimtare

1. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
2. Ngarkohen kryetarët e bashkive, zyrat e gjendjes civile në bashki, DPGJC, IEVP-të dhe KZAZ-të për zbatimin e këtij vendimi.
3. Kundër këtij vendimi mund të bëhet ankim në Kolegjin Zgjedhor Gjyqësor pranë Gjykatës Administrative të Apelit Tiranë, brenda 5 (pesë) ditëve nga shpallja e tij.

Ilirjana NANO	Kryetar (Pro)
Arens ÇELA	Anëtar (Pro)
Dritan ÇAKA	Anëtar (Pro)
Helga VUKAJ	Anëtar (Kundër)
Muharrem ÇAKAJ	Anëtar (Kundër)

Shënim:

Në zbatim të pikës 3, të nenit 20, të ligjit nr. 10019, datë 29.12.2008 “Kodi Zgjedhor i Republikës së Shqipërisë”, të ndryshuar, akti nuk mori numrin e kërkuar të votave për t’u konsideruar i miratuar. Akti u votua me tre vota pro dhe dy vota kundër në parim.